
- 1★ سرینگر غی سنڈے ما رکیٹ مانہ ہوا اک گرنیڈ تہماکہ مانہ 11 افراد زخمی ہو گیا ہیں۔
- 2★ جموں کشمیر غا پلوامہ تیں سلامتی دستاں نے دہشت گرداں غا 2 حمایتیاں نانہ گرفتار کر ليو ہے۔
- 3★ سرینگر غا سمبلی کمپلیکس غے چو فیرے سلامتی بندو بست تگڑا کیا گیا ہیں کیونجے پلک تیں جموں کشمیر اسمبلی غو 5 روزہ اجلاس شروع ہو رہیو ہے۔
- 4★ وزیر اعظم نریندر مو دی نے ٹی بی غی بیماری مانہ کمی لیان غی کوششاں غی سراہنا کی ہے۔

Granade Attack

سرینگر غا اک گہما گہمی آلا با زار ٹی آرسی غے نیڑے اج ہوا اک گرنیڈ حملہ مانہ 11 افراد زخمی ہو گیا ہیں یوہ واقعہ گذشتہ روز ڈاؤن ٹاؤن خانیار مانہ اک ٹاکرہ غے دوران لشکر طیبہ گا اک دہشت گرد غی ہلاکت غے بعد پیش آیا ہے۔ اس حملہ غے بعد سلامتی دستاں موقع ورچ گیا تے زخمیاں نانہ اتوں ہسپتال منتقل کیو گیو ہے۔ اس تہماکہ سنگ علاقہ مانہ خوف و ہراس پھیل گیو۔ تے دکانداراں نانہ اپنی حفاظت واسطے ایساں آواں دوڑتاں دیکھیو گیو۔

CM on Attack

وزیر اعلیٰ عمر عبداللہ نے سرینگر غی سنڈے ما رکیٹ مانہ ہوا گرنیڈ حملہ غی مذمت کرتاں واں کہیو ہے جے سلامتی دستاں نانہ چاہیے جے وے جموں کشمیر مانہ بدھتا دہشت گردانہ حملان نانہ روکن غی ہر ممکن کوشش کریں۔ سی آر پی ایف غا بنکر نانہ نشانو بنا غے پھینکیا گیا اس گرنیڈ تہماکہ غا نتیجہ مانہ 2 خواتین سمیت 11 افراد زخمی ہو گیا ہیں۔ سماجی میڈیا غی اک پوسٹ ور وزیر اعلیٰ نے کہیو جے گذشتہ گجھ روز تیں وادی مانہ حملان تے ٹاکراں غی خبر سُرخیاں مانہ چل رہی ہیں تے معصوم دکانداراں ور اج غو گرنیڈ حملو کافی پریشان گن ہے۔ اسے دوران پولیس غا آئی جی پی کشمیر وی کے وردی نے ایس ایم ایچ ایس ہسپتال غو دورو لا گے زخمیاں غی عیا دت کی۔ ہسپتال غا ڈاکٹراں نے دسیو ہے جے تمام زخمیاں غی حالت فی الحال بہتر ہے۔

OGW Arrested

جموں کشمیر غا پلوامہ ضلع مانہ حفاظتی دستاں نے دہشت گرداں گا 2 حمایتیاں نانہ گرفتار کیو ہے تے ہتھیار تے گولی سکو وی برآمد کیو ہے۔ جموں کشمیر پولیس، 55 راشٹریہ رائفل تے سی آر پی ایف غی 182 ویں بٹالین نے با رین ڈنگپو رہ تیں حزب المجاہدین واسطے کم کرن آلا سجاد احمد ڈار نانہ حراست مانہ لیو ہے۔ پولیس نے یاہ جانکا ری ایکس ور دتی ہے۔ اک پستول، 12 راؤنڈ تے 2 ہتھ گولہ سجاد ڈار غا انکشاف ور برآمد کیا گیا ہیں۔

Assembly Session

جموں کشمیر اسمبلی غا پہلک تیں شروع ہو ریا 5 روزہ اجلاس واسطے اسمبلی کمپلیکس غے کول کال تے پورا سرینگر شہر مانہ حفاظت غا انتظامات تگڑا کر دتا گیا ہیں۔ اسمبلی اجلاس غا شروع مانہ اسپیکر غو انتخاب تے لیفٹنٹ گورنر غو خطاب وے گو۔ اجلاس مانہ اہم مباحثہ تے تقریب شامل رہیں گی۔ 5 نومبر نانہ اسمبلی مانہ تعزیتی اجلاس غو انعقاد وے گو جد کہ لیفٹنٹ گورنر غا خطاب واسطے شکرہ غی تحریک 6 تے 7 نومبر نانہ وے گی۔ 8 نومبر نانہ لیفٹنٹ گورنر غا خطاب ور باقاعدہ تبادلہ خیال وغیرہ ویں گا۔ اسمبلی اجلاس مانہ شراکر داراں غی حفاظت نانہ یقینی بنان غی خاطر 3 پالی حفاظتی نظام اسمبلی کمپلیکس غے اردگرد نافذ کیو جائے گو۔

BJP LOP

سینٹربی جے پی لیڈر تے ایم ایل اے سُنیل شرما نانہ حزب اختلاف غو لیڈر منتخب کیو گیو ہے۔ جد کہ پا رٹی نے نریندر سنگھ نانہ ڈپٹی سپیکر تعینات کیو ہے۔ یوہ فیصلو بھارتیہ جنتا پا رٹی غی سینٹر لیڈر تے بی جے پی غا 28 ممبران اسمبلی غی سرینگر مانہ سونوار غی چرچ لین مانہ بعد دوپہر منعقدہ میٹنگ مانہ لیو گیو۔ میٹنگ مانہ آئندہ اسمبلی اجلاس واسطے بی جے پی غی حکمت عملی بارے وی تبادلہ خیال ہوؤ۔ آئندہ اسمبلی اجلاس پلک تیں سرینگر غا اسمبلی کمپلیکس مانہ شروع وے گو۔ یا د رہ جے نگرہ تیں ایم ایل اے دویندر سنگھ رانا غی اچانک موت تیں بعد بی جے پی غا ممبران اسمبلی غی تعداد 28 رہ گئی ہے۔ بی جے پی آئندہ اسمبلی اجلاس غے دوران اُمید ہے جے بنیا دی معاملات ور زور دیتاں واں حزب اختلاف غو کردار ادا کرے گی۔

Sat Sharma

نو شہرہ اسمبلی حلقہ تیں حال ہی مانہ اسمبلی چناؤ مانہ ہا ریا بی جے پی لیڈر رویندر رینا جھپڑا بی جے پی جموں کشمیر آکائی گا صدر تھا نانہ بتا غے پا رٹی نے ست شرما نانہ بی جے پی جموں کشمیر آکائی غو نوو صدر مقرر کیو ہے۔ پا رٹی نے دسیو ہے جے یاہ تبدیلی معمول غے مطابق ہے کیونجے رویندر رینا سال 2018 تیں پا رٹی غا اس عہدہ ور تھا تے اُن غی اس عہدہ واسطے مقرر مدت مانہ تو سیر کی گئی تھی۔ رویندر رینا نانہ ہُن بی جے پی غا اک قومی ایکزکیٹو ممبر غے طور ور نوو کردار دتو جائے گو۔ آکاشوانی نال گل کرتاں واں ست شرما نے کہیو۔

PM Modi

وزیر اعظم نریندر مودی نے کہیو ہے جے ٹی بی غی بیماری مانہ کمی بھارت غی جدید ٹیکنالوجی سنگ کی جان آلی کوششاں غی وجہ نال ممکن ہوئی ہے تے اُنہاں نے عظم ظاہر کیو ہے جے مجموعی کوششاں سنگ اس سلسلہ مانہ مزید اقدام کیا جائیں گا۔ وزیر اعظم غو یوہ رد عمل وزیر صحت جے پی نڈا غی اک پوسٹ غے بعد آيو ہے۔ جس مانہ اُنہاں نے

کہیو ہے جے عالمی صحت تنظیم ڈبلیو ایچ او نے بھارت مانہہ سال 2015 تیں 2023 توڑی
 ٹی بی غی بیماری مانہہ کمی لیان ور بھارت غی بہتر کارکردگی غو اعتراف کیو ہے۔ ڈبلیو
 ایچ او غو کہنو ہے جے اس موضی مرضی مانہہ بھارت مانہہ ہون آلی کمی عالمی سطح ور
 آن آلی 8 عشریہ 3 فیصدی غی کمی تیں دُگنی ریکارڈ کی گئی ہے۔ وزیر اعظم غو کہنو ہے جے
 بھارت اپنی مجموعی کوششاں غے سہا رے ٹی بی تیں آزاد مُلک بنان در اگے بدھ رہیو ہے۔

PM Bhai Dooj

وزیر اعظم نریندر مو دی نے ہم وطنان نانہہ ”بھائی دُوج“ غی مبارکباد دتی ہے۔ سماجی میڈیا
 غی اک پوسٹ مانہہ جناب مو دی نے تمنا ظاہر کی ہے جے یوہ تہوار پہایاں تے بہناں بشکار
 پیار نانہہ ہو ر دُنگو کرے گو۔ مُلک غا باقی حصاں غی طرح ضلع پونچھ غا لوگ وی بھائی دُوج
 غو تہوار منا رہیا ہیں۔ بھائی دُوج غو تہوار منایا جان غے بعد گل کرتاں اک مقامی بسنیک نے
 کہیو۔۔ باٹ۔۔

Special Trains

بھارتی ریلوے اچ دہلی ایس سی آر تیں مُلک غا بکھ بکھ حصار واسطے 20 غے قریب
 خصوصی ریل خدمات چلا رہی ہے۔ یہ خصوصی ریل خدمات دَرنگا، برانی، پٹنہ، کٹڑھ، مظفرپو
 ر، بالیا کمکھیا تے آعظم گڑھ واسطے چلائی جا رہی ہیں۔ چھٹ پوجا واسطے 145 خصوصی ریل
 گڈیں پہلاں ہی اس مہینہ غی 2 تا ریخ تیں 8 تا ریخ توڑی چلائی جا رہی ہیں۔ تانجے چھٹ پوجا
 غا خصوصی دِناں غے دوران بھارتی ریلویز 7 ہزار غے قریب خصوصی ریل گڈیں چلا رہی ہے۔ تا
 نجے مسافراں غی پہڑ سنگ نبرو جا سکے۔ یہ ریل خدمات اس مہینہ غی پہلی تا ریخ تیں
 شروع کی گئی ہیں۔ جھیڑی 30 نومبر توڑی جا ری رہیں گی۔ تہواراں غا دِناں غے دوران اک
 کروڑ تیں متی تعداد مانہہ لوکاں گا سفر غو اندازو کیو جا رہیو ہے۔ واضعرہ جے ہر سال تہواراں
 غا موسم مانہہ مسافراں غی پہڑ ور قابو پان غی خاطر خصوصی ریل خدمات دستیاب کرائی
 جائیں۔ گذشتہ سال غے مقابلے اس سال 2 ہزار 8 سو زیا دہ خصوصی ریل گڈیں چلائی جا رہی
 ہیں۔ گذشتہ سال 4 ہزار 5 سو غے قریب خصوصی ریل گڈیاں غو تہواراں غا اس موسم غے
 دوران اہتمام کیو گئو تھو۔

Indian army Poonch

سال 1965 مانہہ اچ غے تہاڑے جموں کشمیر غا مینڈھر علاقہ مانہہ فوجی حکمت عملی
 او پی پل غے دوران پاکستانی فوجیاں نال جنگ لڑن آلا فوجیاں نانہہ بھارتی فوج نے اچ
 زبردست خراج عقیدت پیش کیو۔ یا درہ جے اس جنگ غے دوران کیپٹن گوتم مو بائی غے
 ہمراہ 1 سو تیں متا بہا در جواناں نے اپنی جاناں غی عظیم قربانی دتی تھیں۔ تے اُن غی
 کوششاں غا احترام مانہہ 5 مہا ویر چکر، 3 ویر چکر، 13 سینا میڈل تے 11 چیف آف آرمی سٹاف
 توصیقی اعزاز دتا گیا تھا۔ مُلک غی حفاظت کرتاں واں اپنی جان قربان کرن آلا جواناں نانہہ کر
 شنا گھاٹی بریگیڈ گا سینئر افسراں غی قیادت مانہہ فوجیاں نے خراج عقیدت پیش کیو۔
 آکاشوانی نال گل کرتاں واں پیپلز فورم غا صدر سنجے رینا نے اس طرح کہیو۔۔ باٹ۔۔

SSP Kishtwar

ایس ایس پی کشتواڑ عبدالقیوم نے جموں کشمیر پولیس غا شہیداں غا اعزاز تے اُن نانہ خراج عقیدت پیش کرن گا سلسلہ مانہ ضلع پولیس دفتر کشتواڑ مانہ اک تقریب مانہ شہید بہادر جواناں غا قریبی رشتہ داراں مانہ اسکولی بیگ تقسیم کیا۔ اپنو قرض نبھاتاں واں اپنی جان غی قربانی دین آلا بہا در جواناں غا کُنباں غا افراد غی حمایت تے عزت افزائی واسطے یوہ قدم چایو گیو ہے۔ ایس ایس پی عبدالقیوم نے ڈی ایس پی، ڈی اے آر سجاد خان غے ہمراہ شہید جواناں گا افراد کُنبا غو شکریو ادا کرتاں واں اُن نانہ محکمہ غی طرفوں وعدہ غے مطابق اُن غے نال کھلے ربن غو یقین دُبرایو۔ اُنہاں نے کہیو جے شہیداں غی عظیم قربانی غی یا د تے اُن غا بچاں واسطے اک روشن تعلیمی مستقبل نانہ یقینی بنانو جموں کشمیر پولیس غی لگن نانہ ظاہر کرے۔
